

東

華

錄

東華錄

臣周爾蕃恭校

雍正十二年甲寅春正月己卯諭諸王大臣等爾諸王大臣以元旦立春恰遇甲寅年丙寅月戊寅日甲寅時瑞雪繽紛竟日盈尺考之占書最爲嘉祥豐年可慶爲朕稱賀朕素不言祥瑞降諭至再至三爾諸王大臣聞之熟矣凡祥瑞者特其兆爾兆爲吉之先見全在人事贊成凡靈芝卿雲麟鳳嘉禾之屬皆天心所以示喜豈得不以爲慶但須君臣益加修省以祇承庥命果能事事上合天心則祥乃成其爲祥否則其事尚在未成何得遽爲稱慶洪範恭之對待曰狂如或因有嘉兆而不加修省遂侈然自肆則咎徵特在轉移之間爾祥其可恃乎譬如爾諸王大臣朕以其人可用

許以加恩其人一聞朕旨便自放縱頓改前操朕亦惟有收回成命加之以罪豈得更不轉移而仍以恩待乎朕於天人感應之際信之甚篤知之甚明信之篤是以一刻不敢自懈自逸知之明是以不憚反復申明誥誡詩云天維顯思無曰高高在上蓋面前虛空卽是昊天足履撮土卽是大地如人有七尺之軀拔一毫毛則通體皆知痛癢豈人於天地之中舉一念行一事而天地有不呼吸相通者乎作善降之百祥作不善降之百殃如影隨形如響應谷形谷既存而以影響爲不可必之數豈不愚昧之甚夫善者公而已矣心乎天下國家之謂公心乎一身一家者之謂私爲大臣者誠心乎天下國家之公而不計及一身一家之私天有不降之百祥者朕信其必無是理然則其一身一家之計正復得則兩得也苟心乎一身一家之私而不計及天下國家之公天有不降之

百殃者朕亦信其必無是理然則其一身一家之計亦復失則兩失也朕雖深信此理朝乾夕惕不敢刻忘然天下國家之事非朕一身所能獨理書曰天工人其代之朕不能不賴爾諸王大臣之克代天工則朕固不能已於諄諄訓誡爾諸王大臣也人惟無志則不能自立而推諉他人如爲大臣者以天下國家之事爲己事身任之而不辭一人如是人人如是則內外大小諸務有不事事合宜者乎如使八旗部院每事諉之參佐司屬參佐司屬又諉之大臣督撫藩臬諉之府廳州縣府廳州縣又諉之督撫藩臬又或內則諉之於外外則諉之於內皆謂主上自有乾斷如此則朕雖朝乾夕惕亦何由使事事合宜以仰邀上天之嘉祥福應乎今歲元旦時雪既有其兆當益加奮勵朝夕修省以成此瑞慶我君臣其共勉之○甲申諭辦理軍機大臣等據查郎阿摺奏由準噶爾

來投之厄魯特巴圖濟爾噶爾稟稱噶爾丹策零欲前來請和或遣準噶爾之人爲使或卽用內地之人尙在未定又據賊營脫出投赴北路之人亦稱噶爾丹策零見在行查被獲人等意欲遣還請和等語朕思逆賊欲遣使請和者特爲安輯部人分擾我軍之計爾定非實意若不准其所請則必傳諭所屬曰我爲爾等業經引罪求和無奈所請不准用以固結士心而使我軍聞之亦以賊請和而不允遂致懈於效力如此姦謀詭計不可不加詳察爾等密咨兩路大將軍賊若遣使前來但諭以朝廷欲偃息甲兵使眾生樂業屢經遣使爾台吉並無欲和之意每藉端推託今果引罪請和須派親信之人如台吉寨桑等應行事理詳議前來方爲奏達乃止令爾等微員及內地微末之人前來未便收納如此曉諭方合事理至我兵進剿之計斷不可因此遲回濡滯仍照常整備

相機舉行○辛丑定邊將軍平郡王福彭奏軍中駝馬最關緊要見今喀爾喀扎薩克諸藩臣感戴隆恩莫不竭力辦理如喀爾喀貝勒班第等進獻駝馬猶力請停其賞給價值伏念遠臣當此軍興之際不肯私其所有況臣等宗臣如諸王貝勒貝子公等皆有馬場滋生馬匹當需用之時而置之閒散無用之地豈不內愧於心卽臣家稍淡薄見有馬場滋生馬五百匹情願自送軍前備用伏乞 皇上俯鑒微忱恩准所請並將臣摺交諸王貝勒貝子公等一同閱看臣料諸宗臣等必以臣言爲當踴躍爭先切急公之義矣得旨著交宗人府與諸王等閱看○壬寅諭辦理軍機大臣等侍郎查克旦此次前往喀爾喀車臣汗部落諸事辦理妥協甚屬可嘉著給與尙書銜賞銀五千兩其入官房地人口俱著給還

○甲辰諭內閣據大學士嵇曾筠摺奏臣於三月內料理臣母喪

事畢卽趨赴河工凡一應修守搶護機宜悉心籌畫查察各工價
辦妥協所有總河印務伏祈仍著高斌管理臣協同保固伏秋兩
汛平安霜降後籲懇俯准回籍終制等語河工事務嵇曾筠已經
辦理妥協今於料理伊父喪事之後赴工指示機宜則一應工程
自可保固平穩著照所請行再嵇曾筠原籍常州距淮安不遠明
歲工程亦可就近往來協同經理在伊終制之心旣已得遂而河
防事務亦大有裨益矣

二月丁未朔大學士伯兼管兵部尙書事鄂爾泰奏兵部堂司官
蒙混造冊冒銷驛站錢糧得旨驛站奏銷各項銀兩弊端百出從
前兵部堂官何以不行查察鄂爾泰實心任事方不負爲朝廷大
臣從來大姦大弊皆由小事積累而成若能不時畱心查覈遇有
一毫情弊卽行革除何至滋蔓爲害此內外大臣應共相勉勵者

著將此摺交各部院堂官閱看鄂爾泰著交部議敘范時繹等著
交部察議○改福建甯協副將爲總兵管轄延平一協楓嶺一
營○己酉諭理藩院鄂爾多斯貝勒達西拉卜旦病故爾等因伊
怠忽兵事其子喇錫塞楞議降爵鎮國公但喇錫塞楞深知伊父
之罪尚能竭力辦事著封爲固山貝子○辛亥改廣西直隸賓州
並州屬之上林遷江二縣俱歸思恩府轄撥賓州原屬之來賓一
縣仍歸柳州府轄○添設山東登州鎮成山衛汛派千總把總各
一戰守兵一百名駐防養魚池海口○壬子諭內閣直隸省關稅
監督於地方官原不相統轄一切呼應不靈且大小口岸甚多監
督一人勢難分身兼顧地方文武各員以爲無與己事並不協力
稽察則奸商之隱漏地棍之把持俱所不免嗣後凡有監督各關
著該督撫兼管所屬口岸飭令該地方官不時巡查如有縱容滋

擾情弊聽該督撫參處至監督徵收稅課及一切應行事宜仍照

舊例遵行不必聽督撫節制○刑部右侍郎覺羅和托因事革職

○癸丑 上御經筵○丙辰移廣東歸善縣縣丞駐惠州府城欣

樂司巡檢駐三棟墟內外二司巡檢駐梁化墟連州來岡司巡檢

駐東坡觀惠來縣神泉司巡檢駐靖海○己未晉封貝子允祐爲

貝勒○以呂耀曾爲左副都御史

由奉天府
府尹遷

○以兩江總督管江

蘇巡撫事高其倬爲江蘇巡撫○庚申禮部議覆廣東巡撫楊永

斌奏興甯縣民幸登運年一百二歲長子幸伯達八十二歲次子

幸伯玉八十歲三子幸伯錦七十八歲四子幸伯旺七十四歲五

子幸嘉賓六十七歲一門眉壽千載希逢請予旌表以光盛典得

旨依議幸登運著加賞上用段一匹銀十兩○壬戌 上以大學

士張廷玉回京遣內大臣戶部侍郎海望迎勞於蘆溝橋頒賜酒

膳○大學士等議覆營田觀察使陳時夏奏文安大成兩縣界內
修築橫隄一千五百餘丈本年營田四十八頃俱獲豐收但恐水
涸卽成旱田請於大隄東南尙家灶開建石閘隄內挖河引子牙
河之水以資灌溉仍於北岸多開涵洞或添建小閘以資宣洩從
之○乙丑遣翰林院侍讀春山兵科給事中李學裕致祭故安南
國王黎維禱兼敕封故國王嗣黎維祐爲安南國王○大學士等
議奏浙江海塘工程前奉諭旨令該督程元章等先築土備塘一
道堵塞尖山水口漸次改建石塘並於中小疊開挖引河分洩江
流以減水勢今據該督奏稱尖山水口勢難堵塞引河亦難於開
挖查海塘關繫重大其如何捍禦潮勢保護塘工之處自應及早
商辦乃該督漫無成見遷延愈久成功益難應令該督再於中小
疊詳加踏勘如何施工疏濬卽令妥確定議具奏至尖山水口實

係海塘受患之由若不急爲堵塞則每年徒費錢糧究於塘工無補亦應交該督等將應用物料豫購齊備俟冬初水落設法舉行得旨浙省海塘關繫重大固須詳慎尤戒遲疑若總理不肯擔承則分任者愈多瞻顧其何以謀奠安而垂永久程元章毫無確見著將海塘一應工程交杭州副都統隆昇總理令御史偏武前往協辦所需文武工員俱聽隆昇揀調其運辦物料給發錢糧等項仍著程元章料理毋得推諉稽遲○添設貴州黃平州州同一駐舊州獨山州州同一駐三腳壘清平縣縣丞一駐凱里銅仁縣縣丞一駐松桃普安縣罐子窩驛丞一威甯州得勝坡巡檢一黎平府照磨一裁黎平府屬八舟龍里歐陽新化四土司吏目缺移普安縣原駐罐子窩典史回縣城○己巳實授傅德內閣學士○壬申諭辦理軍機大臣等據大將軍平郡王奏稱塔爾馬善等進剿

行至額爾齊斯河地方見逆賊人眾牲畜盡行收去遂領兵暫回
所有懦怯不行速進情由已經移咨飭行等語朕思我軍進襲逆
賊既已探知先行移避卽令深入於事何益平郡王移咨飭行殊
爲過當軍行紀律甚嚴若以大將軍所諭而塔爾馬善等竟不遵
行固屬未便儻勉強前進而擄掠並無所得方今春令馬匹疲瘦
口糧無幾甚爲堪虞斷不得以輕忽貽誤今王之大營見駐池東
離行軍之處甚遠一切軍機所關綦重額駙策凌身在彼地我軍
情形逆賊虛實知之必悉嗣後凡調撥進退之處係策凌承辦事
件俱聽伊總理著密行知照平郡王及額駙策凌○貴州巡撫元
展成奏銅仁府界坡東城西苗民一百六十寨內附○甲戌兆華
緣事降調以宗室塞爾赫爲倉場侍郎由內閣學士遷○丙子予故禮部
左侍郎舒善祭○是月免直隸通州豐潤等州縣浙江新城分水

等縣江南宿州靈璧等州縣雍正十一年被災額賦有差

三月丁丑朔諭內閣范時繹由旗員歷任內外顯職朕念其爲勳臣之後逾格加恩實冀其追思伊祖爲國家竭忠宣力繼述家聲豈料伊在江南任內居心詐僞辦事贖徇吏治官方毫無整飭鹽梟巨盜縱令遠颺甚至奸宄不法之徒私相往來曲爲袒護情弊敗露朕猶諒其愚昧而保全之復用爲北河總督予以自新之路乃當伏汛危險之時袖手旁觀將國計民生視同膜外朕知其不可外用降旨切責撤回京師仍念范氏子孫見爲大員者甚少范時繹屢經獲罪之後定感朕三宥之恩痛自奮勵以圖後效因仍用爲工部尙書兼管兵部事務今復將一切部務巧於推諉玩愒性成全不實心效力是朕屢加特恩而不知感伊屢獲重罪而不知愧誠可謂下愚不移非尋常疏忽之咎可比范時繹著革退尙

書職任以爲負恩溺職者戒○戊寅大學士等議准杭州副都統
隆昇奏浙江海塘工程奉旨命臣總理查得河莊等山之東首舊
有南港河一道舟楫可通今西首沙淤者僅一十五里挑挖甚易
所費亦輕應募夫施工開挖從之○兵部議准雲貴廣西總督尹
繼善奏黔省九股新關苗疆善後事宜八款一台拱舊營地基窄
狹請改建於歐家寨地方以收形勢之勝一九股地方遼闊前議
駐兵一千尙覺單弱請再添兵二千將台拱營改爲一鎮移清江
鎮總兵官駐紮置中左右三營設遊擊三守備三千總六把總十
二酌量分駐下乘稿貢等處以通鎮遠聲勢清江改爲一協設副
將一統率原設左右兩營官兵一台拱既議設鎮請將清江同知
移駐其地清江既議改協請於鎮遠府添設理苗通判一駐紮清
江撫戢苗夷其天柱縣縣丞應裁添設施秉縣主簿一分駐台拱

以備同知任使一台拱糧運緊要查歐家寨前有河一道可以直通下乘請確估疏濬以利輓輸一台拱增駐之兵若新募充補技藝生疏請於各鎮協營兵內擇其精壯熟練者抽撥充補以資緩急一從前焚剿各寨不無逃匿山箐之人請將見在拋荒之田徧行曉諭令復故業一九股地方雖增設官弁多方化導猝難收效請將苗疆界址清查於舊有頭目內擇其良善老成者按寨大小酌定鄉約保長甲長令其管約稽查一古州清江地界相連中多險要應於適中朗硎地方分設塘汛並令文武官弁巡行化誨從之○吏部右侍郎史在甲以病乞休允之○壬午調葛森爲刑部右侍郎以官保爲盛京戶部侍郎

署太僕寺卿

○癸未

上親耕藉田

○甲申刑部議奏參革河南學臣俞鴻圖受賄營私應擬斬立決得旨俞鴻圖著卽處斬學政科場乃國家興賢育才之要政關繫

重大十餘年來各省試官不聞有婪贓敗檢之劣蹟朕心頗喜以爲試事漸次肅清今觀俞鴻圖贓私累萬則各省學政之果否激清朕皆不敢深信矣蓋學政與督撫同在一省學政之優劣督撫未有不深知者止因督撫有所請託分潤代爲隱瞞朕復何從而知之嗣後各省若有考試不公徇情納賄者經朕訪聞除將學政從重治罪外該督撫亦必按照溺職例嚴加處分○賑濟江西新淦等五縣水災饑民○戊戌以徐本爲工部尙書由左都御史遷○刑部議奏參革河南學政俞鴻圖婪贓累萬伊父戶部侍郎俞兆晟平日不能教子及家人曹楷來往京中會銀而俞兆晟愴然罔覺應降二級調用得旨俞兆晟向來品行不端與李維鈞結爲姻親又依附年羹堯門下皆朕所深知者因伊痛自悔過辦事尙有才幹用至戶部侍郎自怡賢親王仙逝復萌故智弊端種種將王數年

苦心整理之成規任意更張甚屬可惡今伊子俞鴻圖納賄婪贓
紊亂學政非尋常私弊可比伊有此逆子豈真一無見聞而欲脫
然事外乎刑部審理時止引失察家人子弟之條希冀從輕完結
大徇情面著將刑部堂官交都察院嚴察俞兆晟著革職令刑部
秉公嚴審定擬儻仍瞻顧徇隱朕必親審以明此案將承審官自
有另行處治之道○己亥定八旗副參領俱爲正四品○以岱奇
爲內閣學士內閣侍讀學士○雲貴廣西總督尹繼善奏官兵進剿普斯
逆夷大捷情形諭普思一帶土賊猖狂皆前歲漏網之賊首自號
神仙迫脅夷民煽惑滋擾今總督尹繼善檄飭各路將弁周儀等
剋期進剿擒斬首惡神仙喃奔等二百餘名招出投誠夷民八千
餘名尙有賊首召補達等三名及其餘黨竄匿未獲攸樂思茅一
帶悉已蕩平尹繼善悉心調度俱屬妥協自應乘此軍威將首惡

盡堵以期一勞永逸至擒獲賊首當卽行正法其眷屬卽行分賞
投誠之眾急宜撫綏脅從之徒量加懲治凡事每懈於垂成忽於
既定尹繼善甫制滇南雖心力俱強而威信未立此舉實關全省
籌畫非僅爲元新普思計也可傳諭尹繼善知之○河東總督王
士俊奏原任河道總督陳鵬年清勤任事於豫省河務著有成勞
請入豫省賢良祠以申報享從之○庚子辦理軍機大臣等議奏
喀爾喀公葛木丕爾於上年冬月嚴寒之時率領官兵過阿爾泰
山嶺開通雪路百餘里深入賊境直抵察罕胡濟爾等處賊眾驚
潰拋棄輜重四路奔逸當經擒獲賊夷男婦人口及馬匹牲畜等
物因賊旣遠遁振旅還師甚屬效力應行文定邊大將軍平郡王
副將軍額駙策凌將葛木丕爾等功績註冊議敘從之○命覺羅
佛凝毅不必在內閣學士內行走○添設廣東龍川縣老隆司巡

檢一○甲辰改直隸晉州及州屬之無極藁城二縣定州屬之新樂縣俱仍屬正定府轄分保定府屬之深澤縣隸定州管轄添設正定府平山縣洪子店巡檢一○改貴州黎平府屬之天柱縣歸鎮遠府轄添設鎮遠縣丞一分駐印水司○是月免直隸滄州興國等十四州縣鹽場竈地雍正十一年水災額課有差

夏四月丁未兵部等衙門議准湖廣總督邁柱奏容美宣慰土司田民如行事奸狡賦性狂妄濫給割付私徵錢糧制度僭越擄掠鄰近土民種種惡蹟罪不容誅經臣臚列糾參蒙恩旨暫停革職審擬令其來京詢問詎意抗違不出假撫恤荒民之名具摺誑奏寬限兩月藐抗如故且移居平山寨作狂悖負隅之舉閩司土民見其不法恐干天討投出者共有五百七十餘人又有石梁司長官張彤砮先率土民投繳印信令箭其不能投出之士眾又計誘

田民如出洞催令起程民如自知眾怨親離投緘自縊按其情罪未足蔽辜伊子弟俱非善類難以承襲請將容美司改土歸流俾土眾早登衽席應將田民如原領敕書印信號紙繳部查銷其一切善後事宜應令該督妥協辦理從之○乙卯諭內閣朕御極以來於滿洲人材廣開登進之路冀收得人之效是以雍正元年定有滿洲亦准考試武場之例今思滿洲弓馬技勇遠勝漢人將來行之日久必致科場前列悉爲滿洲文藝不及漢人又恐考試內場時不免有傳遞代作等弊於作養人材之道未有裨益著行停止○兵部議准山西巡撫覺羅石麟奏山西新平得勝等路邊外地廣民稠實屬緊要請於高廟子地方設衛守備一衙門口地方設衛千總一歸大同府轄赤不漢契地方設衛守備一後營子地方設衛千總一歸朔平府轄從之尋定高廟子新設衛曰豐州衛

衙門口所曰鎮甯所赤不漢契衛曰朔甯衛後營子所曰懷遠所
○丁巳諭宗人府禮部向來定例宗室犯枷責罪者俱准折贖覺
羅犯枷責罪照平人例完結朕思覺羅亦係宗室悉照平人例處
分則宗室覺羅迥然各異而與平人絕無辨別又宗室犯枷責罪
者如概令折贖伊等亦不知儆懼嗣後宗室覺羅若犯枷責之罪
應酌其罪犯輕重卽在宗人府或拘禁或鎖禁分別年限期滿釋
放以抵其罪庶覺羅處分與平日有別而宗室亦知儆戒矣其如
何酌量罪犯輕重分定年限之處著宗人府會同該部定議具奏
尋議有職宗室覺羅嗣後犯笞杖罪者仍照定例會同各該部降
罰治罪其閒散宗室覺羅嗣後有犯鞭笞之罪革去每月應領錢
糧以抵其罪笞二十者革錢糧一月三十者兩月四十者三
月五十者四月至鞭六十者六月七十者七月八十者八月九十

者十月一百者一年若犯徒流者均照八旗人等折柳號日期分別拘禁柳號二十日者在宗人府拘禁四十日二十五日者拘禁五十日三十日者拘禁六十日三十五日者拘禁七十日四十日者拘禁八十日其犯軍流等罪者悉照旗人軍流應折柳號日期在宗人府鎖禁統俟滿日釋放以抵其罪從之○戊午諭吏部各省卓異人員俱有見任地方之責每當大計之年理應先行具本候旨敕交部院查議其與例相符應准卓異者奏聞令其進京引見如與例不符不准卓異者候朕酌量應令引見與否再降諭旨著爲定例○改山東曹東道爲管河道專管通省黃運兩河事務所屬曹州改歸兗莒沂道轄東平州改歸濟東道轄○甲子諭內閣各省府廳州縣俱有地方民社刑名錢穀之責不應無故赴省謁見上司擅離職守是以律例定有處分朕復屢加訓飭通行禁

約聞近年以來此習尙未盡除良由庸陋屬員以奔競趨承爲務
往往借稱公事逗留省會冀博上憲之歡心而無識之督撫亦或
習而不察不知已蹈曠官之咎地方事務有應調取屬員赴省辦
理者該督撫自有酌量若本官任內之事必應面見督撫口稟者
本不常有其他或用文書稟帖皆可通達事情候批指示何必遠
離職守僕僕道途以致公事廢弛詞訟淹滯至於賀節祝壽尤屬
有損無益之虛文若該督以此相尙俾屬員等爭先恐後則其人
之識見可知又何能勝督撫之任耶著再行曉諭儻有仍蹈前轍
者經朕訪聞將屬官上司一併嚴加議處○李玉鉉年老休致以
張廷枚爲福建按察使由糧道遷○增江南通州州同一駐河基鎮改
崇明縣大安司巡檢爲三角等九沙巡檢隸通州轄移狼山鎮右
營千總一駐官河○乙丑命康良親王傑書子輔國將軍巴爾圖

襲封和碩康親王封故康親王崇安子永恩爲貝勒○丁卯以孔

毓璞爲左都御史

由吏部侍郎遷

○常有緣事降調以傅德爲工部右侍

郎

由內閣學士遷

○庚午諭大學士等朕於一切器具但取樸素適用不

尙華麗工巧屢降諭旨甚明前廣東曾進象牙席朕甚不取以爲
不過偶然之進獻未降諭旨切戒今則獻者日多大非朕意夫以
象牙編織爲器或如團扇之類其體尙小今製爲坐席則取材甚
多倍費人工開奢靡之端矣著傳諭廣東督撫若廣東工匠爲此
則禁其毋得再製若從海洋而來從此屏棄勿買則製造之風自
然止息○以宋筠爲奉天府府尹調刁承祖爲江西布政使以張
若震爲浙江布政使

由鹽驛道遷

○辛未準噶爾勞章伊特根兒袞楚

克等率屬百餘口來降○癸酉諭內閣五城司坊等官各有管轄

之地越界聳人固不免滋擾然路遇鬪毆酗酒拐騙嚇詐之徒若

因地非管轄遂置而不問以致逃遁無蹤亦非稽查整飭之道似

應不論何地皆准其拘執移送該城司坊官廳詳該御史審訊發

落至曖昧隱僻不法等事雖訪問的確猶非刻不可緩則准其密

詳該城御史查拏並密詳本城御史存案如此庶無推諉亦不至

攙越應如何定例飭行之處著九卿議奏○以甘汝來爲禮部右

侍郎張渠爲廣東布政使調耿麟奇爲廣東按察使以黃士傑爲

廣西按察使由雲南池東道遷○甲戌歸化城都統丹晉奏吳喇忒鎮國

公達爾瑪機里第等屬下游牧地方去冬雪大風寒人畜傷損蒙

皇上遣理藩院郎中文保等按戶賑濟查明大小共一萬五千

三百八十五口賑濟六月共米七千二百四十石一斗各扎薩克

親身分散貧窮蒙古共沐 皇恩謹造清冊送部查覈下部知之

五月己卯兵部議准湖廣總督邁柱奏湖北施南宣撫司覃禹鼎

與容美土司田民如翁婿濟惡姦貪殘暴在施南銅鼓山私開路徑直抵容美派夫運米私藏礮位今容美土民能明大義將覃禹鼎及施南司印信一併押解到臣理合請旨革職嚴審明正其罪又據施南土民周一昌覃祈德等向化輸誠呈請改土歸流急救倒懸請分設文武官弁以資彈壓應將施南宣撫司准其改土歸流一切善後事宜妥協辦理從之○辛巳諭大學士等彭維新受朕深恩不次擢用爲戶部尙書且令辦事內閣數年以來所以委任優待之者至深至厚伊苟有人心必無忍於背負之理況伊歷任辦事庸碌朕誤視爲過於拘謹限於才力種種姑容今在戶部衙門輒敢徇情作弊植黨營私將怡賢親王殫忠竭力多年經畫之良規任意更張甚屬可惡今刑部審訊此案竟敢懷挾私心公然在朕前巧於舞弊將應行詰問根究之處一槩蒙混開除而反

將那用飯銀輕罪一條擬以大辟似此輕重出入之間顛倒錯亂高下其手朕實不料福敏張照等職司刑官而敢爲此詐僞欺蒙之舉也彭維新所犯罪款非貪賊受賄則朋比黨援非立意作福作威則有心顛倒國是今福敏張照等全然置之不究而反擬失入之條誠不知其何心此案著刑部堂官另行確審定擬儻仍敢固結徇隱朕必親自審訊將刑部堂官與彭維新一體治罪○甲申兵部議准署陝西總督劉於義奏寶豐一縣地處極邊防範宜密請將平羅營參將一守備千總把總各一共設兵四百五十六名移駐其地改爲寶豐營平羅亦屬緊要請將原設寶豐縣守備改爲都司把總改爲千總共設兵二百五十名移置平羅再柔遠堡爲漢夷交易之處夷人從石觜子進口民間田禾難免蹂躪請將漢夷交易移在石觜子塘汎另築一堡以爲集場卽於寶豐營

撥兵四十名駐防新堡再調千總一員兵五十名駐紮柔遠堡專

司巡察以實邊防從之○丁亥以呂耀曾爲吏部右侍郎

由副都御史遷

○己丑移四川成都府水利同知駐灌縣○辛卯吏部等衙門議

准福建總督郝玉麟奏酌覈海疆情形增改府州縣治事宜一福

甯地當衝要崇山峻嶺向設直隸州不足以資彈壓請改爲福甯

府設知府一通判一府司獄兼管經歷事一府教授一並置附郭

一縣設知縣一訓導典史各一同原轄之福安甯德並改建甯府

所轄之壽甯縣統歸福甯府轄一福州府屬之古田縣地方寥廓

錢糧積欠難清內有雙溪地方水土平衍可以建築城垣衙署請

分古田地增置一縣設知縣一典史一訓導一仍隸福州府轄一

泉州漳州二府俗悍民刁地方太廣請各設直隸州分理泉屬之

永春縣改爲直隸永春州隸以德化大田二縣漳屬之龍巖縣改

爲直隸龍巖州隸以漳平甯洋二縣請設直隸知州州同吏目各一教諭改爲學正訓導仍舊從之尋定福甯府新設附郭縣曰霞浦古田分設縣曰屏南○壬辰諭八旗都統等向來八旗官員遇有吉凶之事競尙繁華恣意糜費以致兵民效尤罔知撙節大有累於生計朕屢降訓諭並令九卿等按其品級分別等次酌定規條頒行已久伊等自當體朕教養之苦心各循分位謹守章程以爲仰事俯育之道乃近聞八旗人等仍有未改陋習以誇多鬪靡相尙者不知聖人教人以生養死葬台禮爲孝又曰禮與其奢也甯儉喪與其易也甯戚朕之教人亦卽此意如父母之祭葬必以耗財爲孝獨不思蕩費家產以致不能顧恤品行辱及先人其不孝也更爲何如子女之婚嫁必以厚資爲慈獨不思無所貽謀以致不能養育子孫飢寒困苦其不慈也更爲何如况越禮逾分之

事但覺可恥更有何榮朕之提撕傲覺已至再三而庸愚之人尙未醒悟今特再行宣諭該都統等務須諄切化導並不時稽察俾八旗人等遵照所頒定例實力奉行毋得陽奉陰違負朕崇儉黜奢維風訓俗之至意○實授趙弘恩兩江總督○以德齡協同劉於義辦西路軍需楊祕署湖北巡撫程仁圻署陝西西安布政使河東鹽運使○乙未諭辦理軍機大臣等今年進兵之事兩路將軍大臣等所議互異強行進兵賊人豫知將那移駐牧先爲躲避則我軍徒勞而無所獲勢必復回此事尙無完日朕意今年停止進兵遣使前往宣示利害賊果知懼求和卽行定議完結賊若游移推諉則此際豫行整備明年大兵卽行進剿著額駙策凌署大將軍查郎阿俱來京公同詳議確定於事方爲有濟今年旣暫停進兵可令大兵在科布多相近處擇形勢之地分駐牧馬一應汛哨卡

倫嚴行防備○丁酉諭辦理軍機大臣等北路副將軍額駙策凌
侍郎傅爾學士阿克敦原任侍郎眾佛保西路署大將軍查郎阿
俱著馳驛作速來京著大將軍平郡王帶領傅爾丹暫駐科布多
處總統弁兵辦事平郡王未到之先著塔爾岱常德等暫行辦理
其由烏里雅蘇臺軍營接運糧餉搬送馬匹等事著交明薩穆哈
欽拜等令薩穆哈總統欽拜錫保協辦聽大將軍平郡王指示而
行查郎阿西路軍營一應事務著張廣泗辦理○己亥以楊應琚
署陝西甘肅布政使由西甯道署○辛丑刑部議覆福建巡撫趙國麟
奏武平縣民藍厚正因胞兄藍元正欲占其田毆打殞命應擬斬
立決但其母年老家無次丁藍元正一子年方七歲又有廢疾藍
厚正應否准其畱養恭候 欽定得旨朕因近日刑部法司辦理
刑名案件輕重失倫者甚多因將此本發與九卿詳悉閱看令其

各抒己見於朕前面奏以觀其識見便於教導今日戶部尚書慶復等十七人奏稱弟毆胞兄至死法無可貸刑部尚書福敏張照侍郎王國棟等十二人奏稱藍厚正之母戴氏年逾七十一孫幼穉厚正之罪可以從寬等語朕思人心風俗之本莫重於倫常夫以田土細事而毆胞兄至死實屬人倫之變若因母老而曲從寬宥則凡凶惡之人父母年高兄弟單少者皆得肆行無忌並可置倫常於不問有是理乎此等兇暴之徒枉法容留但足爲人心風俗之害尙望其孝養伊母撫乃兄之幼子俾其成立耶福敏張照王國棟乃專掌刑名之大臣而識見卑庸糊塗姑息至於如此不可不加懲儆著交部嚴察藍厚正照例卽行處斬○癸卯吏部議覆左副都御史鄂爾賽奏六科給事中員缺從前滿漢俱有以員外郎升用者今漢給事中缺出例由漢御史轉用其滿給事中請

照漢給事中之例亦俱以御史轉補從之○甲辰辦理軍機大臣等議覆四川總督黃廷桂巡撫鄂昌奏西陽宣慰土司冉元齡年老患病以庶出第三子冉廣烜捏報嫡長子請襲以代理司事冉廣烜加派貪饕姦惡殘暴以致族目人等情急疊控俱願改歸內地眾口同聲斷難姑容查西陽司屬地方與楚秦接壤風俗情形與內地無異土民等苦其虐累久已離心請改土歸流以順民情應如所請將該地方歸入內地設官經理今黃廷桂等以冉廣烜貪虐各款具本參究再西陽司附近東南一隅尚有石耶邑梅地壩平茶四小土司久欲內屬並應乘機改流以收全局一切事宜令黃廷桂鄂昌妥協辦理從之

六月丙午以邵基爲左副都御史

由劍都御史遷

○丁未湖廣總督邁柱

奏忠尚宣撫司田光祖等十五土司齊集省城呈懇歸流因見承

順保靖桑植諸處改土以來土民安輯各得其所今土眾等既不
甘土弁之魚肉而土弁又不能仍前彈壓是以激切呈請歸流儻
蒙俞允將各土弁分發各營給以外委千把總銜令其食糧以終
餘年則土司官民各遂其生矣得旨忠崗等十五土司望風歸嚮
願入版圖朕俯念輿情准其改流其一切善後事宜著總督邁柱
詳籌定議○改福建順昌縣仁壽巡檢爲縣丞南安縣大盈驛仙
遊縣楓亭驛甯化縣石牛驛驛丞俱爲巡檢仍管驛務增永春縣
黃坂古格地方仙遊縣興泰里巡檢各一○辛亥諭吏部兵部近
來外省不應題補之缺督撫提臣等悉遞行題補較前過多在部
候缺之人未免銓補壅滯嗣後若實因地方緊要必須熟諳風土
之員不得不題補者著於本內聲明亦止可將見任簡僻地方之
員調補所遺之缺仍歸部選內外銓用方各得其平○移四川保

甯府同知駐南部縣給鹽茶同知關防○壬子改福建糧道爲分
巡糧驛道鹽驛道爲鹽法道專管鹽政兼理福廠船工○甲寅諭
內閣從前拏獲賭具議敘從優者原爲力禁地方賭風起見儻該
員等但察究數案爲幸叨議敘之舉其餘仍怠於稽查是徒邀恩
一時而於地方賭風終未禁絕嗣後大小官員等所屬地方有賭
博失於覺察者除照例議處外將從前拏獲賭具議敘之加級紀
錄俱著銷去永著爲例○命湖廣四川督撫設立三峽等處救生
船隻○丙辰移廣東新會營守備駐新甯縣城改增城右營原設
把總爲千總外委把總爲外委千總並增外委千總一○丁巳吏
部議准河東總督王士俊奏衛輝府管河通判經管河工又兼鹽
糧捕務勢難兼顧應將見任通判令其專管河務添設通判一經
理鹽糧捕務河南糧道經收錢糧統計三十餘萬應設庫大使一

照浙江糧道庫大使之例歸開封府經歷就近兼管南陽府南陽縣汝甯府汝陽縣俱附郭首邑地方遼闊各請添設縣丞靈寶縣號略鎮閔鄉縣文底鎮距縣遼遠易於藏姦請將二縣縣丞移駐兼管巡檢職銜以司緝捕滑縣老岸鎮汝陽縣廟灣鎮澠池縣硤石驛固始縣往流集各請設巡檢一從之○戊午復置河南南陽府南召縣設知縣一典史一撥南陽縣訓導一管理學務移見駐南召通判仍回南陽府○癸亥吏部議准河東總督王士俊奏濟南爲山左首郡舊定地制疆域井然自分設直隸高唐泰安二州形勢不聯難資控馭應將高唐州所屬禹城平原陵縣臨邑等四縣及泰安州所屬之長清縣仍歸濟南府轄其高唐州無庸更設直隸州仍歸屬東昌府至肥城一縣應歸泰安州轄再武定州控制海疆爲全省北門鎖鑰州牧一官實難兼顧請將武定州升爲

武定府附郭添設一縣同原屬之陽信海豐樂陵三縣管轄外再以濱州蒲臺霑化利津四州縣及濟南府屬之青城商河二縣統歸武定管轄共計一州九縣成一府治設知府一同知一經歷司獄各一教授一附郭首邑添設知縣一典史一武定州原設之訓導改縣學至樂陵縣舊縣鎮巡檢同駐縣城閒冗可裁從之尋定武定新設附郭縣曰惠民○辛未吏部議准禮部尙書三奏中書科例設滿洲中書舍人一漢中書舍人八筆帖式十二甚屬事簡請照行人司分派禮部辦事之例止畱滿漢中書各一筆帖式二在本科辦事其餘中書七筆帖式十令其分派內閣行走與內閣中書一體分班辦事如遇覃恩內外誥軸繁多仍回本科辦理從之○壬申添設奉天理事通判一共前爲二員一駐奉天府蓋平縣分管海蓋復金四州縣一駐錦州府錦縣分管錦甯廣義四

州縣旗民官員有會審不公等事稽查揭報○是月免直隸薊州
文安等州縣雍正十一年水災額賦有差

東華錄

雍正二十五

臣王先謙敬編

臣周澗蕃恭校

秋七月甲戌朔以白鍾山爲江南副總河調劉藩長爲江蘇布政使以張廷枚爲福建布政使莊令翼爲福建按察使

由廷建邵道遷

○戊

寅改湖南糧驛鹽道爲糧道增驛鹽道一○丙戌調海壽爲工部

尙書憲德爲刑部尙書○吏部議准河東總督王士俊奏東省青

州府屬益都縣附郭繁劇請於該縣屬顏神鎮分置一縣設知縣

一典史一改益都縣訓導爲新縣訓導撥青州營把總一駐紮新

縣其原駐顏神鎮通判一巡檢一俱裁從之定顏神鎮新分縣曰

博山○丁亥命郝玉麟來京陛見以阿爾賽署福建總督

由福州將軍署

○庚寅增京城巡捕三營千總七把總六移北營遊擊駐安定門

外○辛卯吏部議准河東總督王士俊奏山東省改設府縣事宜
一直隸沂州請升爲沂州府裁知州州同學正吏目缺設知府一
通判一教授一經歷一司獄一增置附郭一縣設知縣一縣丞一
典史一以沂州舊設訓導爲新縣訓導並原屬之郟城費縣暨直
隸莒州與所屬沂水蒙陰日照三縣俱歸沂州府轄一沂州原屬
之羅滕鎮巡檢一李家莊徐公店驛丞二請改歸新縣管轄從之
尋定沂州府附郭縣曰蘭山○癸巳諭辦理軍機大臣等西北兩
路用兵已經數年將士效力戎行久在邊外朕心深爲不忍再四
思維或應乘此兵力盛強直進賊境俾軍務早完以息將士或應
遣使往彼諭以利害俾其醒悟二者未能遠定北路副將軍額駙
策凌西路署大將軍查郎阿來京與辦理軍機之大臣悉心計議
伊等意見亦不盡一朕思軍務關繫重大應博採眾論詳慎籌畫

著王公滿漢文武大臣公同會議各抒己見據實具奏○丙申增起居注衙門漢主事一○戊戌康親王巴爾圖等遵旨議奏準噶爾賊夷世濟其惡屢次興戎噶爾丹策零狂悖兇頑較伊父策妄阿喇布坦爲更甚我皇上爲安逸生靈計欲特賜包容遣使前往開陳利害但賊人狡詐性成恐難遽信目今兩路大兵駐紮邊境賊夷之地勢情形俱已深悉且糧糗馬駝軍裝器械無不豫備整齊宜乘此時於北路派兵三萬名西路派兵二萬名約會齊進併力殲除如賊果知畏懼悔禍祈恩我皇上再寬其罪戾議定邊界似屬於事有益大學士張廷玉等遵旨議奏噶爾丹策零擾害生靈早應遣發大兵立加屠滅惟是我聖祖仁皇帝如天之仁於策妄阿喇布坦狂悖妄行猶復曲賜包容不加誅戮我皇上

上以聖祖之心爲心屢示恩諭俾息紛爭恐伊孟浪輕舉騷擾

蒙古是以駐兵邊地以爲防範仍諭兩路大將軍停止進剿仰見
天心仁愛原非必欲毀其巢穴滅其醜類也今賊人自厄爾得
尼招大敗之後勢窮力竭本年春閒我兵從北路襲擊直越額爾
齊斯賊夷驚惶不敢迎戰但罔識 聖心之寬大自以負罪深重
不可復追因此迷而不悟日益冥頑若蒙特遣大臣前往曉以利
害寬其已往之愆予以更新之路噶爾丹策零審度勢力實不能
支諒必誠心悔過俯首求和若仍執迷不悟則是伊自速危亡再
議征討更覺事易功倍矣得旨準噶爾一部落習尙貪殘世濟其
惡竝妄阿喇布坦狡獪非常當其跳梁之時我 皇考聖祖仁皇
帝審觀形勢洞悉機宜會密諭曰彼地遼遠我往則我師徒勞彼
來則彼師受困是以經理八九年惟令兩路將軍陳師邊境以待
之卽將軍富甯安傅爾丹之屢次襲擊亦欲誘之使來便於邀擊

而賊究不至富甯安等亦未多獲而歸此當日之情形也及朕卽位之初籌畫邊事敬佩 皇考之明訓確知策妄阿喇布坦之奸頑持重不肯輕舉且以將弁兵丁等久役在外勤勞可念因將兩路兵馬撤回暫令休息中間緣清書疆界一事遣人曉諭再三朕則開誠布公彼則枝梧巧詐朕仍包容寬宥之未幾策妄阿喇布坦身故伊子噶爾丹策零繼領部落朕慮有侵擾眾蒙古之舉不得不豫爲防範又以其人孟浪無知剽輕任性必率賊眾冒昧前來是以仍於兩路駐紮大兵至於命將一事岳鍾琪久在西陲習於軍旅伊亦踴躍從事因命爲西路大將軍北路大將軍傅爾丹朕恐其才具不勝重任爰允廷臣之推舉並遣查弼納爲副將軍伊陞辭之時朕諄諄詳諭令部署完密度勢審機務策萬全實冀專閫之大臣戮力同心不負簡用也乃噶爾丹策零輕舉妄動果

不出朕之所料於雍正八年冬月發兵侵犯西路此正我師乘時擊賊之機會而岳鍾琪來京陛見請將大將軍印務交與紀成斌署理前此岳鍾琪身在軍營全無布置將駝馬牲畜十數萬置於賊人來路之旁供其掠取紀成斌庸懦不堪於賊人來犯之時畏縮驚惶一籌莫展致賊人得志而去次年賊以全力向我北路初北路領兵大臣與喀爾喀等皆懷賊人斷不敢來犯之心一切軍需又未豫爲完備傅爾丹查弼納等復誤聽俘虜誑言並不奏聞領兵輕進彼時朕卽向廷臣言之賊人恐有詭詐我師此進甚不妥協未幾奏至果墮術中雍正十年正月賊人僅以七千之眾來犯西路深入哈密塔爾沁地方此又易於大創之機會而岳鍾琪身處軍營調度乖舛坐令入網之獸復得駭逸此西路軍營人人切齒痛恨者於是賊志愈驕肆無忌憚傾其醜類以向北路越

過察罕隻爾軍營直至厄爾得尼招地方副將軍額駙策凌等奮
勇擊賊殲其精銳將及萬人餘賊喪膽乘夜遁逃經由札克拜達
里克一帶此地朕豫設重兵萬有四千以遏賊歸路似此殘敗之
賊誠如釜底遊魂但遣兵數千人遮擊便可使隻騎不返乃馬爾
賽坐守空城一旅不發賊至不擊賊去不追俾餘孽猶存邊氛未
息馬爾賽之罪誠擢髮難數也總之朕之籌畫於事先者雖未有
爽而臣工之失機於臨事者則不一而足矣今賊人自厄爾得尼
招大創之後畏我兵威遷徙遠去看此情形兩路軍務一時難以
告竣特召兩路領兵將軍來京與辦理軍機之大臣悉心計議北
路副將軍額駙策凌西路署大將軍查郎阿力主進剿朕以軍務
關繫重大復令在朝王公滿漢文武大臣公同集議茲覽所奏意
見亦不盡一據兩路將軍皆言兵力有餘士氣奮勇賊勢窮蹙人

心離散似此則遣兵進討未嘗不可但 皇考當年聖意與朕本心俱不欲勞師遠涉而駐兵防守邊界又未免時日耽延將士久勞朕心不忍朕意且遣使臣前往準噶爾面諭噶爾丹策零曉以利害示以寬大之恩旨開其迷誤從此畫清邊界彼此不得踰越著北路大將軍平郡王將進駐科布多之大兵仍撤回察罕叟爾以釋賊人疑懼之心若噶爾丹策零聞朕諭旨果有悔心之萌一遵行則兩路大兵俱可徐徐議撤儻仍執迷怙惡自取滅亡俟使臣回京之日別作計議○辛丑吏部等衙門議准河東總督王士俊奏河東總督衙門駐紮河南開封府與山東沿海地方相隔遙遠請移駐山東兗州府俟移駐後裁兗州總兵遊擊二缺設督標中軍副將一城守參將一改兗沂道爲兗沂曹道駐紮兗州以資承辦事件從之

八月丙午遣侍郎傅鼐額外內閣學士阿克敦副都統羅密前往準噶爾諭台吉噶爾丹策零諭曰從前爾遣使特磊奏聞爾父亡故彼時朕卽召入特磊面降諭旨詳加開導令將羅卜藏丹津送至越二三載並無回奏故於兩路駐兵防守邊界爾乃遣特磊奏稱已將羅卜藏丹津孛送至途間聞有兵至故暫停解送特遣人懇求指示伏願廣興黃教愛惜生靈等語朕卽遣使臣杭奕祿眾佛保同特磊前往巴爾庫爾軍營與爾商議諸事因朕躬違和故未將特磊召見令部臣傳旨遣回卽有疑難不便之處亦當彼此遣使議和豈有輕動兵戈之理特磊乃卑賤之人未免捏詞告爾以圖債事爾若果無動兵之心爲生靈黃教起見則當向我國使臣懇切陳奏乃並未接見使臣猝然發兵侵我巴爾庫爾軍營搶去馬匹又發兵阿爾泰地方彼時我國將軍大臣未行請旨忽畧

輕動致爾得利未幾爾兵侵我卡倫我兵於蘇克阿爾達胡地方
迎戰爾遂收兵退去次歲爾復協力來擾喀爾喀遊牧被我師輕
騎掩殺戰於厄爾得尼招地方爾兵大敗今春我哨探兵丁至額
爾齊斯地方時爾遊牧處人俱行遁匿烏魯木齊駐紮之人亦行
移去我兩路將軍大臣卽欲盡驅雄兵乘勢進剿朕悉諭令停止
朕爲天下元后惟以好生爲本並無將準噶爾必行剿滅之意况
得爾土地人民於我大國亦何補之有爾若執迷不息兵戈則我
師更換駐防毫無缺乏之慮不過稍費糧餉耳但如此相持日久
彼此皆勞非徒士卒苦累而馬匹牲畜亦多損傷是以朕心深爲
惻然今特遣使臣侍郎傅鼐學士阿克敦副都統羅密等前來宣
諭朕意與爾商議愛惜生靈彼此罷兵之事若我大兵仍在爾遊
牧近處駐紮恐爾心生疑貳今巴爾庫爾軍兵因使臣由彼處遣

往故暫令守候駐紮其北路已抵阿爾泰軍兵俱撤至察罕叟爾爾欲遵旨罷兵同享安逸卽與遣往大臣明白定議朕已將一切事務面諭大臣爾宜詳思如誠心知過痛改前愆樂遵朕旨則朕將往事盡行寬宥斷不食言至於是非利害爾宜酌定欲搆兵欲止戈欲安逸眾庶欲殘害生靈亦惟爾擇而行之特諭○戊午諭內閣從來天人感應之理捷如影響朕自臨御以來每遇水旱災祲卽恐懼儆畏思政事之闕失虔加省改不肯諉其過於臣民惟是上天之降災往往盡地分疆廣狹不一有鄰省俱獲豐登而一省獨遭荒歉者亦有通省皆收而一府一縣或一鄉一里獨罹災沴者此豈上天有所厚薄於其間哉或由彼地之文武官弁政令乖舛或由本鄉之人庶風俗澆漓其招致之由必非無故不可不敬懍天威上下各自首畏也卽如雍正六年直隸通省地方收成

豐稔惟宣化府所屬之宣化懷來保安三州縣交界之處廣約四十里長約百里獨愆雨澤甚覺亢旱是年冬月他處皆得瑞雪而此地獨少此必地方文武大員不能妥協或無知愚民有干和氣之所致今年六月間又聞宣化地方苦旱七月杪又有被冰雹之處其大有如拳如雞子者田禾多被損傷朕思冰雹雖北方所時有而宣化鄉村被災獨甚爲近來所罕見可見上天垂象屢屢示儆於宣化者顯然若彼地官民或視爲氣數之適然而不知恐懼戰慄思過省愆是不知敬天畏天而爲無忌憚之小人矣其何以感召天和享百室盈甯之慶乎著該部將朕此旨通行曉諭宣屬文武官員兵民著人人各自省疚共戴上天垂象示儆之意以迓將來時和年豐之福○增廣東平遠縣壩頭司巡檢一西甯縣懷鄉司巡檢夜護司巡檢各一裁都城司巡檢一○辛酉吏部議准

河東總督王士俊奏豫省府州縣改設分隸事宜一直隸陳州請升爲陳州府直隸許州請升爲許州府裁知州州判學正吏目等缺各設知府一通判一教授一司獄兼管經歷一增陳州府附郭一縣設知縣典史各一以陳州舊設訓導爲新縣訓導並原屬之西華商水項城沈邱四縣暨開封府屬扶溝太康二縣俱隸陳州府轄增許州府附郭一縣設知縣典史各一以許州舊設訓導爲新縣訓導並原屬之臨潁襄城郟城長葛四縣暨直隸禹州及所屬密縣新鄭二縣俱隸許州府轄一直隸鄭州並所屬滎澤滎陽汜水河陰四縣請改歸開封府轄河南府屬盧氏縣請改歸直隸陝州轄從之尋定陳州府附郭縣曰淮甯許州府附郭縣曰石梁

○壬戌諭宗人府員勒允禕人本庸愚性復懶惰朕從前加恩特封貝勒冀其知恩悛改奮勉向上以副朕期望之意豈料伊秉性

糊塗毫不知感上年派往祭陵伊行至通州稱病而回今年派出又託病不往甚屬無知著革去貝勒降爲公爵以示儆戒引春向來爲人尙屬小心勤謹所以屢加恩眷及封郡王之後肆口輕佻不顧行止迥異從前且所辦該旗事件種種舛錯著革去郡王仍爲貝子管理鑾儀衛衙門事務○乙丑雲貴廣西總督尹繼善奏官兵進剿元江臨安普思一帶逆夷悉平○以覺羅柏修爲內閣學士由御史遷○辛未召王柔來京調竇啟瑛爲湖北按察使以多綸爲直隸按察使由郎中遷○增直隸薊州糧河通判清河道屬滹龍河管河通判天津道屬三角淀管河通判各一祁州管河州同一蠡縣管河縣丞魏縣管河縣丞武清縣管河縣丞各一東鹿縣管河主簿東安縣管河主簿各一潮河外委把總白河外委把總永定河外委把總各一改鎮標安陵汛千總一兵五十三名歸河標

轄河標左營崔黃口汛右營西儀集汛把總二兵七十六名歸鎮標轄○壬申諭內閣謝昃本一司官之職朕因其有辦事諳練之名不次擢用至湖南河南藩臬兩司歷任上官皆言其優因簡用江西巡撫乃伊到任以來一切辦理及奏請事件瞻徇模稜虛偽不實是以降旨內用侍郎再加試看今據接任巡撫常安奏稱伊在江西任內吏治懈弛官糧逋欠營伍曠廢竊賊眾多種種玩愒之狀不可枚舉著革職○以顧祖鎮爲內閣學士由詹事選○裁太常寺犧牲所滿所副一增設漢所牧一

九月乙亥諭刑部國家刑名最關緊要而九卿秋審定擬尤爲讞獄大典各省撫臣所奏若輕重不同九卿當悉心斟酌務期畫一以成協中之治假使寬縱者仍其寬縱嚴刻者仍其嚴刻則各省刑名委之督撫更無餘事又何用廷臣之集議乎嗣後秋審案件

若其中有應改而不改及不應改而妄改者經朕察出定將九卿
從重議處若九卿及與議之官員等意見或有不同准兩議陳奏
請旨定奪卽眾人皆同而一人獨異者亦准陳奏○丁丑諭內閣
各省所定府州縣衝繁疲難等缺多未確當著各該督撫再行詳
細查明據實具題如具題之後將來接任督撫仍有題請更改者
將原題草率之督撫交部議處其苗疆煙瘴邊遠等缺亦著一體
分晰確當具奏如有疏忽亦照此議處○禮部議准江西布政使
李蘭奏故唐御史中丞張巡見危授命保障江淮江西居民廟祀
最盛捍禦鄱陽一湖屢昭顯應請加封賜祭從之尋封爲鄱陽湖
顯佑安瀾之神○戊寅兵部議准直隸總督李衛奏裁改官弁兵
丁事宜一張家口協標請裁遊擊一左右營守備二千總五把總
九改右營都司爲左營中軍守備一改張家口協標參將爲遊擊

增千總二把總三裁柴溝營參將一改柴溝營守備爲都司一改龍門路遊擊爲都司所轄趙川堡守備爲千總添撥龍門路屬長安嶺把總一成長安嶺都司歸宣化鎮轄一改石匣營副將爲提標前營遊擊裁守備一千總一把總三一裁順義營遊擊一撤原撥居庸路把總一歸本營改懷來路參將爲都司懷來路中軍守備爲懷來城守備一增岔道汛守備一永甯路千總一東馬營外委把總一一移石匣營守備一駐天津鎮添撥甯河縣把總一韓村外委把總一一改順德廣平兩營都司俱爲遊擊各添撥千總一外委把總一杜勝營添撥千總一外委把總一移開州千總駐臨洺關添撥開州城守備一把總一高家鋪等集外委把總磁州彭城鎮外委把總各一一移易州馬水口外委把總一駐黃莊司紫荆關外委把總一駐奇峯口原設官莊嶺汛兵駐孔奇莊添設

馬水口把總一涑水縣把總一一改河協城操營守備爲景州營
守備移城操營外委把總駐大龍灣南皮縣外委把總駐馮家口
馮家口把總駐南皮縣一添撥馬水口營固城店把總一撤原撥
高陽新安二縣之河協外委把總二回本營添撥高陽新安外委
把總各一一添設張家口外太平莊把總一黑河川千總一一宣
化府屬之沙城延慶州屬之永甯城並古北口城內各增巡檢一
從之○辛巳吏部議准宗人府府丞張國棟奏賢良方正出身人
員原因行止端方才品素著始膺保薦得官之後除因公誣誤仍
照定例議處外如犯貪酷不法等案應分別加倍治罪至原保舉
之州縣道府及不能查出之督撫等亦請分別加等議處從之○
甲申遣吏部侍郎呂耀曾大理寺卿德福往貴州宣諭古州等處
苗蠻人等諭曰朕爲天下生民主撫御萬方凡有血氣皆吾赤子

莫不望其遂生復性以同受朝廷之德化是以各省苗徭猥獍種
類雖殊皆漸次經理化其頑梗期其善良况爾古州等苗人尤非
僻處窮邊者可比地界在黔粵兩省之中與內地人民土壤交錯
乃從前惡習相沿罔知法度恃其險阻出沒無常擾害居民邀截
行旅且卽同類之中自相仇殺報復相尋以強陵弱以眾欺寡視
劫奪爲固然等人命如草芥此等殘忍之風朕實深爲憫惻故於
數年前命封疆大臣等經理化導其怙惡抗拒者不得不懲以兵
威而革面革心者悉加意撫綏俾遊樂土今苗疆諸事就緒凡爾
苗眾皆爲服教向化之良民矣不但朕民胞物與一視同仁之懷
於焉大慰卽爾苗眾亦當知去危苦而就安全離湯火而登衽席
豈非爾古州等處從來未有之美俗乎如果自茲以往戕賊之念
不萌頑梗之心不作安居樂業守法奉公樸者優游於耕鑿秀者

沐浴於詩書爾等苗眾與土著之民一同上進且使爾子子孫孫服疇食德永受國家教養之福豈不善歟今因苗疆奠定特遣大臣會同該省文武大員親歷古州等處宣朕諭旨並賞賚爾等苗眾其仰體朕心祇遵朕訓父教其子兄勉其弟族黨親朋互相勸勵共敦善俗永息刁風以副朕育正羣生之至意○改順天府北城黃土司巡檢爲清河巡檢駐清河○戊子諭內閣各省生童往往因與地方有司爭競齟齬相率罷考此風最爲惡劣士爲四民之首讀書明理尤當祇遵法度恪守憲章化氣質之偏祛醫陵之習况國家之設考試原以優待士子予以上進之階凡此生童不知感戴國恩鼓舞奮勉而乃以私忿罷考爲脅制官長之計有是理乎嗣後如果該地方官有不公不法陵辱士子等情許生童等赴該上司衙門控告秉公剖斷儻不行控告而邀約罷考者卽停

其考試若合邑合學俱罷考卽全停考試該部妥議通行○辛卯諭內閣嗣後凡繕寫諭旨進呈時將硃筆更改者甚多並著各處查出謄寫與硃筆所改之旨一併呈覽○海壽緣事解任以刑部尙書憲德兼理工部尙書事○壬辰西路副將軍張廣泗等奏本年九月初四日吳爾圖水有賊數百人夥聚藏匿臣卽飛飭副都統班第達什原任總兵張元佐遊擊郎建業於初五日五鼓齊赴喀桃以南蘆草溝一帶復飛飭固原提督樊廷帶兵赴鱸泉子地方分路搜剿果於喀桃遇見賊夷潛伏我兵奪據山梁衝入賊隊連敗賊眾越過噶順直抵鄂龍吉大坂計斬賊四百餘人生擒三十六人身負重傷者甚眾所獲馬匹器械口糧等物無算追殺一百七八十里餘賊遠遁得旨張廣泗調度分遣悉協機宜在事將弁兵丁等俱各奮勇直前得獲全勝甚屬可嘉著從優議敘賞賚

署大將軍查郎阿雖奉調來京然自統兵以來與張廣泗同心協力整飭戎行鼓勵士氣此番克捷亦由查郎阿平日訓練整頓之所致著一併交部從優議敘○癸巳諭刑部爾等職司邦禁弼教明刑惟一秉至公庶幾大小獄訟歸於平允夫胸中不存一物但存一片公心猶恐人之情僞難窮未必事事協於至是何况先存一從寬從嚴之見橫據胸中以待事至是則纖塵著眼泰山在前而不能覩豈能得其實情又况挾私徇情顛倒是非乎至於用刑不可視爲習慣人情乍見則心怵目驚相習則安之若素朕在藩邸時奉 聖祖仁皇帝諭旨審理事件初見夾訊竟至戰慄悲涕迨經數次辦理之後便視爲尋常人情熟習薰染之爲害如此爾等日日習見未免臨事輕率務須保守此心常如初見之怵惕更須將面前聽訊之人之心詳細體量委曲推求則不特不敢輕易

用刑且心誠求之何患情實之不得夫事之情形不一如人之面目不同雖極相似之案件若細心推求必有不同之處非律例之所能該縱使加倍增添律例亦斷不能全該未來之案件若非實心辦理秉公衡量其輕重之間豈能無失爾等如肯以至公之心求其平允則刑貪戮暴正所以爲集福之基如其寬嚴任意輕重失衡或且以婦寺之仁曲貸姦宄之命以爲求福之道斯則自求其禍有何福之可得朕於此理見之甚明爾等深信力行自有效驗勉之慎之又諭朕每閱讞至罪重惡極人犯雖情理可惡必平心靜氣將伊致罪情由詳加審度苟有一綫可生之路必爲之細細推求其生而不得方置之於法不敢因一時之見而失於嚴至情似可原者朕推情度理必其實有可原然後加以矜恤亦不敢任一時之見而失於寬爾等刑憲大臣尤須詳體此意於讞獄

時必設身處地詳慎推求以期允當一案有一案之委曲一犯有

一犯之情罪不可有意於寬亦不可有意於嚴大凡人之處事始

而矜持久則漸熟未必不輕忽任意若於用刑之時能常存初任

刑憲之心庶刑獄得其平而天下無冤民矣○調楊超會爲刑部

額外侍郎呂耀會爲倉場侍郎

由吏部右侍郎調

○福建總督郝玉麟奏

臺灣府彰化縣沙里興社生番內附○乙未命雲南廣西省開鑪

鼓鑄○丙申改廣西貴縣辛安寨巡檢爲五山汛巡檢駐陸村移

平南縣大同鄉巡檢駐大烏墟裁武宣縣安永巡檢一移原駐武

宣縣城之縣郭鎮巡檢駐縣郭

冬十月丙午果親王允禮奏凡臣工條奏理宜據實敷陳不當相

爲授受及摭拾已行之事希圖塞責嗣後係細微之事本部院大

臣卽酌定辦理如該員不行呈明酌定而率爲條奏者交部分別

察議儻已經呈明而該大臣不行酌定仍准其聲明條奏若事果

應行將該大臣議處至羣相參酌摭拾舊事混行瀆奏者從重治

罪得旨果親王所奏是著交該部照所奏行並通行曉諭輪班條

奏之大臣官員知之○丁未命陝西督撫確查州縣歛收之處奏

請蠲賑○韓光基緣事革職以顧祖鎮爲工部左侍郎

由內閣學士遷

吏部議准直隸總督李衛奏熱河八溝地方各該管官事宜一熱

河地方旣設承德州知州一員應令原設同知通判專管旗人之

事該知州專管民事一口外幅員甚廣凡遇盜案請令該汛武職

會同文員協力緝捕一熱河監獄請專歸承德州管理並添設吏

目一員以資督捕一八溝同知原爲專管三處喀喇沁民人事務

而設若仍令承德州兼理恐有彼此推諉情弊應將該地方民人

命盜案件命該同知自行驗審如有關涉蒙古之事令會同值年

章京驗審一八旗既駐有專官應將熱河東河通判所管之八溝東街等處歸於該同知章京管轄一八溝同知所司會審案件應與章京並列官銜用同知關防徑行詳解達部無庸向喀喇沁各王子處用印一命盜等案民人事件關涉蒙古者該章京行令扎薩克等交與所轄地方查緝解送一八溝東街向有與熱河通判協辦之守備千總各一員應撥與八溝同知就近協辦巡查並請照通判衙門之例添設巡檢一員一八溝同知承德州知州請仍隸霸昌道管轄並照邊缺之例三年無過卽行升用一熱河理事同知通判等所管巨細案件向例俱應先報內部定擬人犯由古北口提督轉解與內地州縣不同今既設立知州同知等官請嗣後除在外法司難以定案者仍會審徑行解部外一切旗民命盜照例申解該上司審擬具題一八溝地方遼闊該同知駐紮之處

請酌量添設遞馬五匹捕役八名以供差遣從之○禮部議准署
湖南巡撫鍾保奏永順自設府分縣以來人文日盛請於永順府
城內建立考棚設教授一所屬永順龍山保靖桑植等四縣各設
訓導一再永順縣向有永定衛歸併戶口桑植向有慈利縣歸併
戶口俱附澧州考試今永順既設考棚自應各歸本籍從之○己
酉諭大學士等朕思欲小民各得其所亦非必不可得之事如內
外大小各官果皆知爲臣不易之道實心實力教養斯民雖不能
風移俗易亦可使之安居樂業若以小民犯法爲伊自作自受與
己毫無干涉是視斯民之痛癢漠不關心矣夫州縣不特爲民之
父母亦民之師長也須刻刻提撕教誨不啻訓課蒙童與之講解
自然漸漸明曉常見有諄諄與一人言而旁聽者竟能領會故知
教導之法貴優游漸漬非偶然宣講上諭便可謂教民也卽如招

冊內案件俱係爲上者不能教養所致而不肖有司尙敢營私壞法納賄徇情朕不知伊等實具何等肺腸天下上智之人不教而善者不可多得下愚不移者亦少惟中材之人最多全賴有司善爲訓迪見良善者扶持之兇暴者懲治之使百姓曉然於良善之必獲福兇暴之必取禍則誰不勉爲良善之徒乎○諭鬼神之道實爲體物不遺古聖賢云無愧衾影蓋實見得隨處有神明所以如此戒謹耳惟信以爲有而時時誠敬厥後必然受福若以爲無而事事怠慢厥後必然受禍理有一定毫髮不爽也○命尙書三秦徐本俱協辦內閣大學士事○庚戌王國棟緣事革職以楊超曾爲刑部右侍郎額外侍郎○壬子賑直隸霸州固安等十七州縣被水饑民○癸丑命江蘇截留漕糧二十萬石於被水州縣平糶並於冬春之際發倉散賑○諭原任大學士田從典品行端直老成

謹厚居官廉潔奉國公忠應入賢良祠以風有位著九卿會議具奏尋議照例入祠立傳再於其家賜祭一壇從之○戊午諭內閣向以浙江吏治營伍俱須整理而浙閩總督駐紮閩省未免隔越是以特授李衛爲浙江總督兼管巡撫事務此係因時制宜隨才任使一時變通之政並未永著爲例也今浙江事務經李衛辦理以來已漸整頓而程元章又以伊之才力難兼總督巡撫鹽政三重任恐致曠誤爲辭近郝玉麟來京陛見朕看其才具精神足以貫注兩省著仍照舊例授郝玉麟爲浙閩總督程元章以總督銜專管浙江巡撫並兩浙鹽政事務又從前降旨將廣西一省暫隸雲貴總督管轄者因廣西與貴州接壤俱有苗疆應辦事務若非該總督總統節制恐文武官弁呼應不靈今苗疆用兵事竣諸事就緒年來內外臣工俱奏稱廣西距雲南路遠廣東路近不若就

近爲妥便等語滇黔兩粵情形本是如此卽朕初意亦不過俟苗疆事竣仍行照舊非謂尹繼善不能兼管三省而前後互異也其應否仍隸廣東之處著九卿會議具奏○己未諭內閣向因倉場米石關繫緊要在京十倉每倉或都統或副都統各派一員御史各派一員專任稽察之責於倉場不無裨益但從前未定更換之期見在各員中有歷至三四年者朕思日久因循易生怠惰且恐偶有疏虞該員慮干失察因而掩飾彌縫亦未可定著定爲三年更換之例屆期各倉一同更換若有接任之員未滿三年卽屆更換之期者亦一體更換庶稽察嚴密而瞻顧之弊可免該部卽遵諭行○諭原任大學士高其位端方廉潔忠厚和平簡任綸扉壽登大耋應入賢良祠以旌耆舊著九卿會議具奏尋議照例入祠立傳再於其家賜祭一壇從之○以巴泰爲工部尙書

原任工部右侍郎

郎

○調喬世臣爲工部右侍郎以王紘爲刑部左侍郎調趙國麟

爲安徽巡撫以盧焯爲福建巡撫

由河南布政使遷

○甲子以勵宗萬爲

內閣學士

由鴻臚寺卿遷

○丙寅諭內閣四川夔州稅務向因未定章程

從京師派員前往監督數年以來章程漸定不須特遣官員著照

舊例仍交地方大臣委員管理○給事中黃佑奏請將國朝臣工

文詩賦頌派員遴選刊布直省得旨著內閣禮部翰林院等衙門

議奏尋議我國家文運昌隆超越前代 聖祖仁皇帝御製文集

精微廣大燦若日星我 皇上聖學高深文明光被宸章奎藻炳

蔚古今凡在珥筆諸臣廣揚盛烈歌詠昇平或朝章國典譜以聲

詩或上瑞嘉符形於雅頌以至應制紀恩詞林館課誠宜搜輯蒼

萃刊刻頒行俾海內士子有所程式再查康熙四十八年大學士

陳廷敬等編集 皇清文穎一部業經進呈因選擇尙未精當是

以未行頒發今請將原本交發翰林院派員遴選謹將 聖祖文

集選錄冠於卷首並懇 皇上頒發御製詩文敬謹編入垂示萬

世至諸臣所作除將文穎所選者詳慎刪錄外其嗣後廷臣進呈

詩頌等冊一併發出彙選務取音律和平詞義正大者陸續編次

進呈俟書成之日刊刻頒行從之○己巳景陵寶城山瑞芝生

十一月壬申朔諭內務府大阿哥允禔薨逝著照貝子之例辦理

○癸酉諭宗人府大阿哥允禔之子弘昉著封爲鎮國公○加原

任工部右侍郎年希堯左都御史銜○甲戌以劉章爲河南布政

使楊宏緒爲浙江按察使由福建鹽道遷○丙子諭內閣四川布政使劉

應鼎朕原不知其人因伊在四川建昌道任內稱譽者甚多是以

就近歷任至布政使亦駕輕就熟之意數年以來朕觀其屢次奏

摺並無實心實政有裨地方之處心亦疑之今據總督黃廷桂參

奏顯有貪利營私種種劣蹟劉應鼎深負任用著解任交與總督
審擬四川布政使員缺著湖北按察使賈啟瑛補授湖北按察使

員缺著河南管河道白映棠補授○以邵基爲吏部右侍郎

由副都御

史

○壬午諭內閣朕聞閩省漳泉地方民俗強悍好勇鬪狠而族

大丁繁之家往往恃其人力強盛欺壓單寒偶因小故動輒糾黨
械鬪釀成大案及至官司捕治又復逃匿抗拒目無國憲兩郡之
劣習相同而所屬之平和南勝一帶爲尤甚朕思上天陰隲下民
與以至善之性故云民之秉彝好是懿德雖五方之風氣不齊而
本然之性則有善而無惡漳泉之民亦未有天秉獨異者其所以
不善之故則因俗尙鷺陵漸成積習耳聞目見皆剽悍桀驁之風
而無禮讓謙遜之心遂令本然至善之性陷溺而不自知也其中
卽有善良之人亦不過自潔其身實難以數人之力挽風俗之澆

滴朕自臨御以來屢頒諭旨訓迪內外臣庶詳明諄切至再至三
自通都大邑至僻壤遐陬咸使之家喻戶曉而各省民風漸能奉
法循理不敢蕩檢踰閑且如最難化者莫過苗蠻犛犵之人近亦
頗知革面革心有欣欣向化之意豈漳泉內地之人轉不如苗眾
等之悔過遷善革薄從忠而甘於自暴自棄陷身法網乎朕心深
爲不忍特降諭旨切加訓導易曰積善之家必有利慶積不善之
家必有利殃書曰作善降之百祥作不善降之百殃此言善惡感
召之機捷於影響作奸犯科之人旣爲王法所不宥必爲天理所
難容禍福利害之間判然兩途則爾等亦何所憚而不爲善何所
利而爲不善乎大抵居鄉之道親睦爲要保身之道循分爲先毋
以強陵弱毋以富欺貧毋以智侮愚毋以眾偪寡毋爲行險僥倖
之事毋爲干名犯義之行父老子弟聯爲一體鄰里鄉黨視爲一

家相相助息訟息爭使朝廷旌爲義鄉有司表爲仁里身名俱
泰刑罰不加天下樂利之事安適之境無過於此况閩省文風頗
優武途更盛而漳泉二府人材又在他郡之上歷來爲國家宣猷
效力者實不乏人獨有風俗强悍一節爲天下所共知亦爲天下
所共鄙何不翻然醒悟共相勉勵而成禮義仁讓之鄉乎著該督
撫仰體朕心時加訓誡更立勸懲之法實力奉行務俾俗易風移
以副朕一道同風之至意○丁亥兵部議准河東總督王士俊奏
東省裁衛設縣事宜一大嵩成山二衛請改爲二縣裁衛守備教授
授各一設知縣典史教諭各一一靖海威海二衛裁衛守備教授
各一添設巡檢各一靖海衛卽以甯海州議裁之乳山寨巡檢移
駐威海衛卽以文登縣原屬之溫泉寨巡檢移駐均歸併文登縣
管轄一萊陽縣行村鄉巡檢改隸大嵩新縣文登縣赤山寨巡檢

改隸成山新縣從之尋定大嵩改設縣曰海陽成山改設縣曰榮

成○戊子封理密親王允弼子弘眺爲輔國公○以陳世倌爲左

副都御史

由順天府尹遷

○命原任湖南按察使王柔前往江南與太僕

寺卿俞兆岳協理海塘事務○庚寅戶部議准河東總督王士俊

奏東省向有寄莊地畝一項以彼邑民人買置此邑地畝因而不

派差徭止於正供之外每畝徵銀一二分至四五分不等名曰外

徵以代徭役但地畝之授受不常官吏得以上下其手今東省丁

糧俱經攤入地畝何必留此外徵之名請將歷城等六十一州縣

寄莊地畝並歷城益都二縣照寄莊徵銀之廢薄基地工項所有

外徵銀兩各按州縣地畝一併均攤以杜偏累之源絕加派之弊

從之○壬辰兵部議准河東總督王士俊奏東省裁改衛所事宜

一萊山一衛雄崖浮山二所請改歸卽墨縣轄靈山一衛歸膠州

轄所有守備千總教授各缺俱裁一鰲山衛原設把總請改爲千總靈山衛把總亦改爲千總雄崖浮山二所各添設把總一一二衛二所既裁應各添設巡檢一駐紫除掖縣原屬之柴葫寨膠州原屬之逢猛司及益都縣顏神鎮議裁之巡檢三員請分撥移駐外再添設巡檢一以資查緝從之○癸巳吏部議准四川巡撫鄂昌奏道府州縣分轄改設事宜一川東道屬之順慶府請改隸川北道川北道屬之綿州請改隸松茂道松茂道屬之資州改隸永甯道夔州府屬之新甯縣改隸達州一川東道原轄之渝關稅務請就近歸重慶府管理一直隸嘉定潼川二州俱請升爲府治設知府通判經歷各一二府附郭各增置一縣設知縣典史各一並原屬各縣俱歸府轄改州學正爲新縣敎諭州訓導爲新縣訓導從之尋定嘉定新升府曰嘉定附郭縣曰樂山潼川新升府曰潼

川附郭縣曰三臺○甲午免陝西階州等三州縣本年逋賦其人
民所借口糧應於秋收後徵還者俱行豁免西安同華榆葭等州
屬民借食糧亦照例免還○諭朕聞涼州府鎮番縣屬柳林湖地
方屯田地畝經加銜侍郎蔣洞估計開墾修築渠壩置備農具等
項共銀七萬八千餘兩而辦理此事率多營私作弊蔣洞委用原
任知縣潘治州判石廷棟二人所修渠工岸壩在在草率俱經冬
水衝塌而蔣洞視同膜外不問不究又今春下種之時種少報多
隱匿籽種一千餘石又平地工價一項共該銀七千八百兩委官
領去分發屯民而潘治石廷棟等朋比分肥短發工價銀四千餘
兩又蔣洞將屯田下贖存銀八千二百餘兩虧空無存朕所訪聞
如此蔣洞受朕深恩何以負恩溺職至於此極非派員確查難定
虛實著副都御史孫國璽前往涼州將以上情節詳確查勘無得

私毫瞻徇○辛丑諭內閣朕賞各省兵丁生息銀兩原交與該管大員善爲營運以濟緩急之用從前有草率從事者卽將此銀借給兵丁收取利息以爲賞卹似此辦理甚不妥協朕已降旨諭飭嚴行禁止近聞仍有無識無能之總兵官希圖省事暗中借給兵丁者又有兵丁假商人借領之名而其實自用官銀繳利者朕思兵丁切要用度莫大於吉凶二事朕旣已賞給銀兩則二事可以粗備至於尋常衣食之類無銀則可節省有銀易至輕費此乃人情之常今見有官銀可借到手甚易一時用去將來補償無資其拮据之苦仍官兵親受之豈朕愛養加惠之本意乎至於兵丁假借商名領銀繳利更爲不可兵丁旣非殷實之家又非久慣貿易之人虧折之後從何賠補不但領銀之兵受累於目前且致將來之兵不能受國家之恩澤此顯然可見者著各該管大臣一一清

查若有似此情弊速行更改儻官銀不敷營運不妨據實奏聞或地僻難於招商不妨輕減利息若取兵丁之息銀以爲賞卹是以朕惠兵之心而成將來累兵之舉則該管大員經理不善之罪無可寬貸除從重議處外仍將虧欠之項責令賠補

十二月癸卯諭內閣據程元章奏稱臣以巡撫兼司鹽政所有緝私一事必賴弁兵協力同心始克整頓請嗣後有關鹽政事宜仍令各鎮協營照舊分辨督緝儻有歧視玩忽臣卽據實題參等語大凡經理鹽政必以緝私爲第一要務從前惟總督李衛管理兩浙鹽務時恤商裕課事事妥協程元章接任之後朕諭令做照舊規毋得紛更成法乃伊管理以來兩浙鹽務雖不至於做壞聞已漸不如前程元章此奏蓋恐將來鹽政漸弛而豫留地步以武弁不歸統轄爲卸過之計獨不思程元章爲總督已數年鹽政漸不

整理又豈武弁呼應不靈之咎耶著照程元章所請凡揀選將弁
及一切兵馬營制自聽督臣郝玉麟辦理外其有關於鹽務事宜
著各鎮協營聽程元章派辦督緝如有歧視怠忽者則據實指參
似此文武合爲一體兵弁聽其督派鹽務稍有不整則責有攸歸
矣○增廣東陽春縣黃泥灣巡檢一移欽州屬營界司巡檢駐龍
門瓊州屬臨高縣博鋪司巡檢駐和舍市○乙巳辦理軍機大臣
等議准歸化城都統丹晉奏歸化城添設同知等官之處經臣等
奏請覆准在案查歸化城地廣事繁俱係原設同知辦理兼有協
同察哈爾鄂爾多斯扎薩克等辦理之事誠不可無分司之人但
添設同知一員恐轉致互相推諉應請停其添設同知於歸化城
南之和林格爾東之坤都倫西之托克托城西北隅之薩爾齊等
四處各添設筆帖式一員駐紮令與原設同知協辦事務三年限

滿更換從之○改陝西西安鹽道爲督糧道驛傳道爲驛鹽道○
戊申兵部議准工部尙書徐本等奏臣等奉命浙江審事查浙江
衢州爲福建兩江門戶請將衢協副將一缺改爲衢州總兵官置
中左右三營以資彈壓衢協原設都司二員一改爲中營遊擊一
改爲守城都司並添設右營遊擊一駐江山左營遊擊一駐常山
原設守備三員一改爲中營守備一改爲城守都司守備其原駐
江山守備改爲右營守備外請另添左營守備一防守華埠再應
添千把各一除原設千總五把總十一並將平陽一營嚴州金華
二協各裁千總一員撥補外請另添把總五員並於通省簡僻各
營內抽撥兵丁三百名以備衢鎮之不足其提屬之嚴州一協楓
嶺一營處州鎮屬之蘭谿一汛俱就近歸衢鎮轄至金衢嚴三府
幅員甚廣查察須有專官請復設分巡金華嚴道一員駐紮衢州

府城再添設同知一員駐紮峽口以便巡查從之○庚戌移奉天

府原駐蓋平縣之理事通判駐熊岳○辛亥以奚德慎爲內閣學

士

由給事中遷

○癸丑吏部等衙門遵旨覆奏廣西省向與黔省均有

辦理苗疆事務是以暫令雲貴總督統轄今黔粵兩處苗蠻輸誠

向化用兵事竣請循舊制將廣西就近仍歸廣東總督統轄從之

○甲寅諭內閣在京滿漢小京堂內若有平時粗諳河務情願前

往河工協助河道總督辦事者著自行舉報爾等奏聞請旨○丙

辰刑部尙書憲德奏臣部事件繁多見今封印在卽辦事之堂官

甚少應請派員協辦得旨命徐本福敏協辦刑部尙書事○丁巳

以魏廷珍爲兵部尙書調顧琮爲漕運總督朱藻爲直隸河道總

督以白鍾山爲河東河道總督

由江南副總河遷

○以高斌仍署江南河

道總督

由兩淮鹽政署

○己未諭內閣聞甘州地方於上年正月內有提

標兵丁張宏印等六人行劫張掖縣民陳進孝家傷害事主陳訓一案見在審擬又本年九月內張掖縣民李福家一連兩夜被劫十月內有張掖縣民王建文家被盜二案及拏獲盜犯張雷等九人俱係甘州提標兵見在食糧者從來甘肅一帶民風醇樸素無大盜劫奪之案况今歲河西各屬俱獲有秋糧價亦較往年平減其涼肅二鎮兵丁亦各安靜守法而甘提標兵輒敢數十成羣公然盜劫該管員弁平日所司何事如何訓練約束竟至如此肆行無忌署提督劉世明由侍衛微員朕加恩用至提督總督伊在總督任內毫無善績可稱其弟劉錫瑗竟牽連於山西叛案之內朕猶格外開恩赦宥嗣因西路領兵需人念伊熟悉邊地情形特召來京授以副將軍之任豈料伊一到軍營諸事委靡退縮全無奮勇宣力之意西陲弁兵無不恥笑之其罪與武格等朕猶念其久

歷戎行不忍遽令廢棄仍令署理甘州提督印務以爲贖罪自新之路豈料伊在任二年一味苟且因循視國家之事如同膜外朕屢次訓飭毫不悛改今伊所轄兵丁目無國法劫奪橫行擾害良善謂之令人髮指不識劉世明具何心胸而負恩溺職至此也劉世明著革職交署總督劉於義會同巡撫許容將兵丁行劫各案及縱兵爲盜負恩溺職情由一一嚴審定擬具奏甘州提督印務著副都御史二格前往署理內閣學士岱奇見差往甯夏有辦理事件俟辦理後前往肅州協助劉於義辦理軍需事務○吏部遵旨將情願河工效力人員帶領引見得旨內閣侍讀學士劉永澄授爲南河副總河鴻臚寺卿劉勳授爲河東副總河俱著加僉都御史銜其河東副總河阿蘭泰著回京○庚申諭禮部前據太常寺奏請於雍正十三年正月初十日恭祭 祈穀壇今據順天

府府尹奏稱於雍正十三年正月十二日進春朕思祈穀乃新春典禮似不應在立春以前著該部會同太常寺悉心定議具奏尋議謹按禮經月令所載祈穀典禮原在立春之後所以順時令召農祥也查康熙五十五年正月初十日應祭祈穀壇其時尚未立春 聖祖仁皇帝命大學士等定議於正月三十日辛卯致祭 祈穀壇並請嗣後每年祈穀俱在立春後辛日舉行永著爲例從之

○雲貴總督尹繼善奏本年十月二十九日恭逢 聖壽之辰雲南楚雄大理等處卿雲見○辛酉調葛森爲盛京刑部侍郎申珠渾爲刑部右侍郎○刑部議奏廣西南甯府屬之遷隆崗差目修建營房越占安南地界土目王元光土練廖廣土官黃震中等應分別治罪得旨依議從前渠那設隘旣由奸民廖廣圖利唆令遷

隆土官黃震中妄稟而勘界員弁惟聽土官之言遂爾立隘設防
今經該督撫等查明渠那地方實非遷隆所屬之內地已將淦梯
隘移置於剝馬村板蒙隘移置於柏心村中外之界以十萬山下
小河爲限並將土官等分別治罪著總督尹繼善巡撫金鉉將勘
明地界改設隘口及渠那地方給還安南遵守各緣由行文該國
王知悉並飭令守隘員弁不時巡查毋得縱放內地奸民出外騷
擾以副朕懷柔遠人之至意○壬戌兵部以進剿桌子山碁子山
青海及南北西三川等處軍功奏請議敘得旨軍功議敘乃國家
賞功之大典必至公至確始足以表章勞績鼓勵軍心從前桌子
山碁子山征剿一案乃年羹堯岳鍾琪張大其事有意捏成者卽
在事效力官弁亦不過以伊等私心任意開入冊內冀邀議敘並
無功績可紀應不准議敘○癸亥調胡瀛爲湖北按察使白映棠

爲湖南按察使○是月免安徽滁州宣城等州縣衛及直隸霸州
永清宣化萬全等州縣被災額賦有差○是歲琉球國入貢○人
丁戶口二千六百四十一萬七千九百三十二又永不加賦滋生
人丁九十三萬七千五百三十田土山蕩畦地八百九十萬一千
三百八十七頃二十四畝有奇徵銀二千九百九十萬一千六百
三十一兩有奇米豆麥四百七十九萬三千八百二十八石有奇
草五百五十七萬四千六十九束茶三十四萬三千七百一十一引
行鹽四百九十三萬六百二引徵課銀三百九十九萬二千五百
五十七兩有奇鑄錢六萬八千五百三十九萬有奇